



DR. AINI (duduk empat dari kanan) bergambar kenangan dengan barisan panel seta peserta pada forum 'Keseimbangan Ideal Sukan dan Akademik' di UPM, Serdang baru-baru ini.

Usaha lahir ramai atlet berwibawa

Oleh MUHAMMAD ZUHAILY BADLISHAH

AKADEMI Sukan Universiti Putra Malaysia (UPM) mengambil inisiatif tersendiri dalam misi melahirkan lebih ramai atlet kebangsaan yang bukan sahaja cemerlang dalam sukan, malah menguasai bidang akademik juga.

Contoh terdekat ialah atlet terjun wanita negara, Cheong Jun Hoong yang berjaya meraih pingat perak pada Sukan Olimpik 2016 baru-baru ini bersama pasangannya, Pandelela Rinong dalam acara 10 meter platform serirama wanita.

Jun Hoong yang merupakan pelajar Ijazah Sarjana Muda Komunikasi di Fakulti Bahasa Moden dan Komunikasi, adalah salah seorang daripada tiga pelajar UPM yang bertanding di pentas Sukan Olimpik 2016.

Dua lagi ialah atlet menembak, Jonathan Wong Guanjie dalam jurusan Ijazah Sarjana Muda Kejuruteraan Aeroangkasa dan ratu pecut Malaysia, Zaidatul Husniah Zulkifli (Ijazah Sarjana Muda

Pendidikan Jasmani).

Lantaran itu, Akademi Sukan UPM lebih gemar untuk bermula dari peringkat akar umbi dengan 'mendidik' ibu bapa mengenai kepentingan dan keseimbangan ideal antara sukan dan akademik.

Menurut Pengarah Akademi Sukan UPM, Profesor Dr. Shamala Subramanian, pihaknya telah menjalankan fasa satu dengan menganjurkan program pensijilan sukan untuk ibu bapa selama tiga siri tahun lepas.

"Sekarang pihak kami mahu memberikan lebih penekanan terhadap kepentingan akademik dalam sukan dengan bermula dari peringkat akar umbi sehingga ke fasa universiti.

"Sebagai contoh, kalau ibu bapa ada pengetahuan, mereka boleh memberikan latihan kepada anak-anak mereka walaupun dari rumah sahaja dan paling penting sekali ialah dari segi penyediaan pemakanan yang sihat," katanya.

Selepas itu, satu forum 'Ke Arah Keseimbangan Ideal Sukan dan Akademik' telah di-

adakan bagi memberi pendedahan berkenaan cabaran serta kaedah-kaedah mencapai kecemerlangan dalam kedua-dua bidang tersebut.

Forum yang dirasmikan oleh Naib Cancellor UPM, Profesor Datin Paduka Dr. Aini Ideris turut menyaksikan kehadiran Timbalan Presiden Majlis Olimpik Malaysia (MOM), Datuk Seri Mohamad Norza Zakaria.

"Pemikiran lama bahawa penglibatan sukan akan menjelaskan pencapaian akademik adalah tidak relevan lagi.

"Syarikat-syarikat yang menemu duga para graduan juga memberi penekanan tinggi terhadap penglibatan kokurikulum sebagai pengukur kejayaan seseorang itu," jelas Aini Ideris sewaktu forum tersebut.

Program seterusnya bakal dijalankan oleh Akademi Sukan UPM ialah karnival sukan melibatkan ibu bapa dan murid daripada beberapa sekolah terpilih dan disertai juga Pertubuhan Wanita Negeri Sembilan (NSWO) pada Oktober depan.